



Nuuk 18. oktober 2018

UKA2018/104

Jens Napätök, Partii Naleraq

Kalaallit Nunaanni pinerluttulerinermi Inatsimmi § 20 imm. 2-p allanngortinnissaa pillugu danskit naalakkersuisuinut attaveqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni unioqqutitsinerit imaluunniit inatsimmi § 99 naapertorlugu unioqqutitsinerit ilungersunartut immikkut taasat pisortanit unnerluutiginnittussaataasunit eqqartuussinermut utaqqisitassamut atatillugu unnerluutiginnissutissanngortillugit.

(Inatsisartunut ilaasortaq Steen Lyngge, Demokraatit)

Siullermeernera

Inatsisartuni ilaasortap Steen Lyngge, Demokrattit Inatsisartut aalajangiiffigisassaattut siunnersuutaanut Partii Naleqqamiit siunnersuuteqartoq qujaffigerusupparput.

Internettimi aqqutigalugu attaveqaatikkut inuit naapittarfiini oqallittarfiini maannakkut periarfissaalersimavoq suniluunniit siuararterisinnaaneq. Tamannalu pitsaaquterpassuaqarpoq, kisiannili aamma mamarliinerit, salluliornerit allatigullu nikassaanerit ingerlanneqarsinnaasarlutik.

Siunnersuuteqartoq isumaqartigaarput inoqatinut innarliisut ilaatigut kingunerlorujussuarsinnaasut allaat aaqqinneqaqqissinnaangitsumik kinguneqartut akuersaarneqarsinnaanngilluinnarput, taamatullu pisoqartillugu qujanartumik periarfissaqarpoq iliuuseqarnissamik Kalaallit Nunaanni pinerluttulerinermut inatsimmi § 99 naapertorlugu nikanarsaasutut eqqartuunneqarsinnaammata.

Taamatullu eqqunngitsumik pineqartut §99 naapertorlugu inuinnarnit unnerluussutaasussaavoq, tassalu eqqunngitsumik pineqartup nammineq eqqunngitsumik pineqarnini eqqartuussivimmuut suliaissanngortittussaallugu.

Tamatuma ajornanginnerusumik periarfissarsiorsinnaanera Partii Naleqqamiit periarfissaasinnaasut ilaattut taarusupparput. Tassunga ilanngullugu misissugassaqqissagaluarpoq 500 kr.-imik akiliuteqartariaqartarneq naleqqussaaffigisinnaanera, ingammik akissakinnerusut eqqarsaatigalugit, taakku aamma pisinnaatitaaffeqlutik illersorneqarsinnaanerat periarfissaqartariaqarlunnarmat.

Partii Naleqqamiit ilanngullugu pingaarsoraarput susassaqtut tusarniaaffigineqarnissaat, tassungalu tunngatillugu politiit allalu ilanngullugit oqaaseqataat nalilersuilluarnermut toqqammaviusariaqtut.

Taamatut oqaaseqarluta suliap annertuup sukumiisumik susassaqtut ilanngullugit suliaralugu ingerlaqqittariaqarnera isumaqarfigatigu taamatut oqaaseqarfigalugu nanginneqarnissaa kaammattuutigaarput.